

Dangui Oduber (MEP)

Entrante 1 augustus 2015 Aruba tin un gobierno nobo, CAFT

ORANJESTAD – Nos pais a wordo goberna pa un gobierno irresponsabel. Un gobierno cu a gasta placa di pueblo den prioridad nan robes, fia placa, redobla debe di nos pais y manda nos pais bancarota. Debe di pais Aruba a surpassa 82% di nos GDP y segun IMF ora un pais chikito manera Aruba tin un debe asina grandi bo por conclui cu nos pais ta tecnicamente bancarota.

E situacion cu tin actual na Aruba tawata algo di spera. E gobierno aki no a goberna nos pais responsabelmente y no a mantene e gastonan di gobierno abou. Contrario na esaki na a aumenta e gastonan di gobierno na un manera explosivo y awe nos pueblo ta sintiendo e consecuencianan di e maneho desastroso aki. Nos pais a wordo priminti cu e gobierno di Mike Eman lo mehora poder di compra, nos a wordo priminti cu lo reduci e costo di bida, nos a wordo priminti cu lo elimina BBO, nos a wordo priminti cu lo reduci e tarifa di coriente cu 25%. Awe ta net contrario a sosode y asina aki Mike Eman a traiciona confianza di su mesun hendenan y gaña tur hende. Awe Aruba ta pasando den momentonan dificil. Famianan no tin cuminda, placa no ta alcanza mas y gobierno na luga di mehora e poder di compra ta castigando pueblo cu mas y mas medida.

E maneho di Mike Eman cu a crea un deteriora social aki a Aruba a conduci cu awe tin supervision financiero. E supervision aki ta danki na e maneho desastroso y irresponsabel di Mike Eman y su gobierno. Nan e demostra incapacidad pa goberna nos pais y cu e CFT permanente aki ta un brevet van onvermogen pa e gobierno aki. Nos no mester lubida cu for di aña pasa nan a haya un KB (koninklijkbesluit) y awe e supervision financiero ta un hecho. Prome minister Mike Eman kier bende pueblo un 6 pa un 9 y kier haci como si fuera e protocol cu e la firma cu gobierno Hulandes ta algo bon pa nos pais. Loke e no ta bisa pueblo ta cu e protocol cu e la firma Aruba lo tin un gobierno nobo entrante 1 augustus 2015. Entrante 1 augustus 2015 e gobierno nobo lo carga e nomber gabinete CAFT. Firmando e protocol

Mike Eman no solamente a entrega nos autonomia financiero sino e la kita autoridad di parlamento di Aruba cu ta e organo di mas halto di nos pais. Parlamento di Aruba semper tawata tin e autoridad pa trece cambionan den leynan cu wordo presenta na parlamento di Aruba, e

amendements recht. Cual-kier cambio cu parlamento kier haci e lo por a haci. Firmando e protocol aki Mike Eman a KITA e autoridad aki for di parlamento di Aruba. Parlamento di Aruba mester trata e ley di CAFT manera cu e wordo presenta y NO por haci ningun cambio sin

aprobacion di Rijks minister Raad na Hulanda. Ki clase di prome minister por haci esaki cu su mesun pais? E protocol aki ta devastador pa nos pais y ta kita e tiki autonomia cu nos a keda cun'e. Gobierno Hulandes a pone gabinete Mike Eman 2 bao curatela y a mara nan na man

cu pia. Gabinete Mike Eman no por a maneha nos pais y a crea un situacion explosivo na Aruba caminda esun cu mas ta wordo afecta pa e gobierno nobo ta e pueblo! E unico responsabel pa e situacion cu nos ta aden ta gabinete Mike Eman 1 y 2 y ningun otro hende! □